

Igitassanik eqqaasarnermut piumasaqaatinit immikkut akuersissuteqarnissaat pillugu Namminersorlutik Oqartussat nalunaarutaat nr. 2, 5. februar 2020-imeersoq Atuussimasoq (Historisk)

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. novembari 2011-meersumi (avatangiisinut inatsit) § 10, imm. 1-imi, nr. 5, 6, 23 aamma 25, § 35, imm. 2, § 40, imm. 1 aamma 2, § 45, imm. 2-4, § 56, imm. 1 aamma § 66 imm. 3 naapertorlugit aalajangersarneqarpoq:

§ 1. Naalackersuisut Igitassanik eqqaasarneq pillugu Namminersornerullutik Oqartussat nalunaarutaanni aamma Suliffeqarfinit il.il. avatangiisit innarlitsaaliorneqarnissaat eqqarsaatigalugu immikkut ittumik akuerineqarsimanngitsunit mingutsitsinerup killilersimaneqarnissaa pillugu Namminersornerullutik Oqartussat nalunaarutaanni piumasaqaatinit immikkut akuersissuteqarsinnaapput.

§ 2. Eqqakkat tamarmik atortuni tamatumunnga atorneqarnissaanik akuerisaasuni suliarineqartassapput.

§ 3. Eqqakkat ikuallanneqarnissaminnut naleqqutinngitsut ikuallanneqannginnissaat kommunalbestyrelsip qulakkiissavaa.

§ 4. Eqqakkat ikuallanneqarnissamut naleqquttut taamaallaat atortumi tamatumunnga akuerisami ikuallanneqarsinnaapput.

Imm. 2. Eqqakkat ikuallanneqarnissamut naleqquttut, kommunip eqqagassanut aqqissuussineranut ilaasut aammalu eqqakkat aalajangersimasumik innersuuneqartut atortumi tamatumunnga akuerisami ikkuallatassanngorlugit innersuunneqarnissaat kommunalbestyrelsip qulakkiissavaa.

Imm. 3. Kommunalbestyrelsimit qinnuteqartoqarneratigut sivisunerpaamik qaammatini pingasuni ammaannartumik ikuallaasarallarnissamut imaluunniit eqqakkanik ikuallanneqarsinnaasunik toqqorsigallarnissamut, aammalu atugassarititaasut piumasaqaatillu uku naammassineqarsimanissaat apeqqutaatillugit Naalackersuisut immikkut ittumik akuersissuteqarsinnaapput:

- 1) Najukkami, nunap immikkoortuani nunaluunniit tamakkerlugu eqqakkanik ikuallaavimmik avatangiisinut akuerisamik peqartinnagu, ikuallaavik akuerineqartoq ingerlatinnagu imaluunniit allanik peqquteqartumik ikuallaavik atorneqarsinnaatinnagu.
- 2) Piffissami atuisinnaanngiffiusumi kommunalbestyrelsi eqqagassalerinermi aaqqiissutissanik

tamakkiisunik sulissuteqassapput.

3) Kommuni eqqagassalerinermut pilersaarummik akuerisamik peqassaaq.

Imm. 4. Naalackersuisut immikkut ittumik akuersissummi imm. 3 naapertorlugu piumasaqaatinik sukumiinerusunik aalajangersaasinnaapput, taakkunungalugu piumasaqaatit piffissamut ikuallaaviusussamut, ikuallaariaatsinut atorneqartunut, kiisalu sanaartukkanut imeqarfiillu killeqarfiinut ungasissusissat minnerpaaffiitut tunngasut ilaatinneqarput.

§ 5. Pillaammik akiliisussanngortitsisoqarsinnaavoq, pineqartoq § 4, imm. 3 naapertorlugu immikkut ittumik akuersissuteqarnermut piumasaqaatinik unioqqutitsippat.

Imm. 2. Kalaallit Nunaanni pinerluttulerinermut inatsimmi kapitali 5-imi maleruagassat naapertorlugit suliffeqarfimmut pillaammik akiliisussanngortitsisoqarsinnaavoq

§ 6. Nalunaarut 6. februar 2020 atuutilersinneqarpoq.

Namminersorlutik Oqartussat, ulloq 5. februar 2020

Kim Kielsen

/

Mette Skarregaard Pedersen